



---

Broj: 03/1-05-1-533/18  
Sarajevo, 15.5.2018.

**PREDMET:** Radna posjeta institucijama zakonodavne i izvršne vlasti Republike Srbije, Beograd, 27.-29. mart 2018. godine, informacija

Sifet Podžić, predsjedavajući, Borislav Bojić i Borjana Krišto, zamjenici predsjedavajućeg Zajedničke komisije za odbranu i sigurnost BiH, i Boško Šiljegović, parlamentarni vojni povjerenik BiH u periodu od 27. do 29. marta 2018. godine boravili su u radnoj posjeti institucijama zakonodavne i izvršne vlasti Republike Srbije.

Dana 27.3.2018. u Beogradu su razgovarali s članovima Odbora za odbranu i unutrašnje poslove Narodne skupštine Republike Srbije i članovima Delegacije Narodne skupštine Republike Srbije u PSNATO-a.

Marija Obradović, predsjednica Odbora, i Dragan Šormaz, predsjedavajući Delegacije Narodne skupštine Republike Srbije, s članovima Odbora bili su domaćini članovima Zajedničke komisije za odbranu i sigurnost BiH. U prijateljskoj atmosferi razmijenjena su mišljenja o radu. Razgovarano je o trenutnim aktivnostima, težištima u radu, o problemima u nadzoru sektora odbrane sigurnosti, aktuelnim sigurnosnim izazovima te o sve izraženijim mogućnostima unapređenja bilateralne i regionalne saradnje.

Borjana Krišto, predsjedavajuća Predstavničkog doma PSBiH i zamjenica predsjedavajućeg Zajedničke komisije upoznala je domaćine s trenutnom političkom situacijom u BiH, s evropskim i euroatlantskim putem te o mogućnostima daljnjeg unapređenja bilateralne saradnje, posebno saradnji parlamentarnih tijela i dva parlamenta u cjelini. U otvorenoj i prijateljskoj atmosferi razgovarano je i o nizu drugih pitanja te su članovi obje delegacije saglasni da su međusobni susreti i razgovori najbolji način unapređenja bilateralne i regionalne saradnje.

Razgovorima u Narodnoj skupštini Republike Srbije prisustvovao je Zoran Perković, otpravnik poslova u Ambasadi BiH u Republici Srbiji te predstavnik Misije OSCE-a u R Srbiji.

## **Posjeta Ministarstvu odbrane Republike Srbije**

Drugog dana radne posjete institucijama zakonodavne i izvršne vlasti Republike Srbije (28.3.2018.) članovi Zajedničke komisije za odbranu i sigurnost BiH i parlamentarni vojni povjerenik posjetili su Ministarstvo odbrane Republike Srbije gdje ih je primio Aleksandar Živković, državni sekretar u Ministarstvu odbrane, s saradnicima.

Delegacija Zajedničke komisije za odbranu i sigurnost BiH i parlamentarni vojni povjerenik informirani su o trenutnim aktivnostima ovog ministarstva, procesu izrade strategijskih i doktrinarnih dokumenata, razvoju sistema odbrane, o međunarodnoj vojnoj saradnji, o provođenju međunarodnih integracija i misija kao i o nivou bilateralne saradnje u sferi odbrane između Republike Srbije i Bosne i Hercegovine.

Predstavnici Ministarstva odbrane Republike Srbije prezentirali su i program opremanja Vojske Srbije, proces javnih nabavki, proces snabdijevanja Vojske Srbije materijalnim sredstvima te održavanje infrastrukture i probleme logističkog snabdijevanja u širem smislu.

Članovi Zajedničke komisije posjetili su i Komandu Centralne logističke baze iz sastava Uprave za logistiku Generalštaba Vojske Srbije gdje su imali priliku neposredno sagledati aktivnosti na logističkom osiguranju Vojske Srbije. Brigadni general Petar Latković sa saradnicima bio je domaćin članovima delegacije.

**U popodnevnim satima članovi Zajedničke komisije** za odbranu i sigurnost BiH i parlamentarni vojni povjerenik posjetili su Univerzitet odbrane Ministarstva odbrane Republike Srbije gdje su održali sastanak s državljanima Bosne i Hercegovine koji su polaznici Vojne akademije, Škole za generalštabno usavršavanje, Škole za komandno-štabno usavršavanje i Visokih studija sigurnosti i odbrane.

Tokom sastanka s 29 državljana Bosne i Hercegovine, među kojima su kadeti i oficiri, polaznici tri nivoa školovanja na Univerzitetu odbrane, članovi Zajedničke komisije i parlamentarni vojni povjerenik informirali su ih o aktivnostima Zajedničke komisije, o aktuelnoj političkoj situaciji u Bosni i Hercegovini te njihovom viđenju stanja u sektoru odbrane Bosne i Hercegovine.

Oficiri Vojske Srbije koji neposredno rade s kadetima i polaznicima informirali su članove Zajedničke komisije o programima usavršavanja polaznika navedenih škola, o toku njihovog školovanja i uslovima za rad. Bilo je zadovoljstvo slušati pohvale na rad i izvršavanje obaveza polaznika iz Bosne i Hercegovine koji su trenutno na Univerzitetu odbrane.

Uslovi za rad i usavršavanje na Univerzitetu odbrane izuzetno su dobri, a školovanje polaznika iz Bosne i Hercegovine realizira se u sklopu postojećih bilateralnih sporazuma Ministarstva odbrane BiH i Ministarstva odbrane Republike Srbije. Zaključeno je da mogućnosti za unapređenje bilateralne saradnje po pitanju školovanja državljana Bosne i Hercegovine ima, te da Ministarstvo odbrane Republike Srbije u ovom trenutku stvara još bolje uslove i za smještaj polaznika i za unapređenje nastavnog procesa.

Polaznici Visokih studija sigurnosti i odbrane MO R Srbije uskoro će biti u radnoj posjeti Bosni i Hercegovini i tom prilikom bit će i gosti Zajedničke komisije za odbranu i sigurnost BiH, što je već postala praksa tokom njihovog studijskog putovanja.

**Dana 29. marta 2018. godine članovi Zajedničke komisije** za odbranu i sigurnost BiH i parlamentarni vojni povjerenik posjetili su Generalštab Vojske Srbije gdje ih je u ime načelnika Generalštaba primio brigadni general Dejan Janković sa saradnicima. U veoma srdačnom razgovoru general Janković i njegovi saradnici upoznali su članove Zajedničke komisije sa svojim trenutnim aktivnostima.

Posebno se razgovaralo o načinu snabdijevanja Vojske Srbije, o edukaciji, opremanju Vojske Srbije gdje su predstavnici uprava iz sastava Generalštaba upoznali članove Zajedničke komisije o pozitivnim praksama u svom radu. Razgovaralo se i o iskustvima Vojske Srbije u civilno-vojnoj saradnji, angažiranju tokom elementarnih nepogoda te nizu drugih pitanja.

Članovi Zajedničke komisije su tokom susreta u Generalštabu Vojske Srbije s domaćinima sumirali dvodnevnu posjetu Vojsci Srbije i MO R Srbije gdje su posebno naglasili veoma srdačan prijem, veoma profesionalan i otvoren pristup razgovorima i otvorenosti tokom posjete jedinicama i komandama Vojske Srbije.

General Janković sa svojim saradnicima posebno je naglasio činjenicu da je bilateralna saradnja Vojske Srbije i Oružanih snaga BiH izuzetno dobra, da kadeti i polaznici OSBiH, koji se školuju na Univerzitetu odbrane MO R Srbije postižu izvanredne rezultate. Vrlo su profesionalni i uspješni i posjeta članova Zajedničke komisije je kod polaznika iz BiH primljena s posebnom pažnjom.

**Predsjedavajući Zajedničke komisije** za odbranu i sigurnost BiH Sifet Podžić i parlamentarni vojni povjerenik Boško Šiljegović posjetili su i Ured zaštitnika građana Republike Srbije.

Robert Sepi, zamjenik zaštitnika građana Republike Srbije, sa saradnicima primio je delegaciju PSBiH i informirao ih o aktivnostima Ureda. Razmijenjena su mišljenja o brojnim pitanjima iz djelokruga ureda parlamentarnog vojnog povjerenika BiH i zaštitnika građana Republike Srbije, te je dat osvrt na njihove izvještaje o radu u 2017. godini.

Parlamentarni vojni povjerenik Boško Šiljegović upoznao je domaćine o stanju ljudskih prava pripadnika Oružanih snaga BiH, o svojim aktivnostima tokom posjete jedinicama i komandama te o saradnji sa Zajedničkom komisijom za odbranu i sigurnost BiH i institucijama BiH koje se bave pitanjima zaštite ljudskih prava. Robert Sepi i njegovi saradnici prezentirali su aktivnosti Ureda, stanje ljudskih prava u Republici Srbiji te istakli i pitanja koja se odnose na zaštitu ljudskih prava pripadnika Vojske Srbije u dijelu koji je u njihovoj nadležnosti.

Članovi Zajedničke komisije i parlamentarni vojni povjerenik posjetili su Ambasadu Bosne i Hercegovine u Republici Srbiji gdje ih je osoblje Ambasade upoznalo o svojim aktivnostima i bilateralnim odnosima Bosne i Hercegovine i Republike Srbije.

**KOMISIJE**

**PREDSJEDAVAJUĆI**

Sifet Podžić